

Deo optimo maximo uni & trino, Virgini Deiparæ, & sancto Luca orthodoxorum Medicorum Patrono.

## QUÆSTIO MEDICA

Quodlibetariis disputationibus, manè discutienda in Scholis Medicorum, die Jovis decimâ-tertiâ Novembris.

M. PETRO JACQUEMIER, Doctore Medico, Præside.

*An propria Medici scientia œconomie animalis cognitio?*

**Q**UANTUM emolumenti rebus Medicis affert propria Medici scientia, tantum iis apportat detrimenti inutilis aut malè locata cognitio. Illinc veritatis, hinc opinionum origo. Si Medicus alieni curiosus quod sui pensè erat, imprudens prætermittat, hoc infelix subit fatum, nihil non experiri, absolvere nihil. Artifex erit, non qui in fingendo, sed qui in observando sedulus erit. Nova quantumvis cudad systemata, telluris, aquarumvè lustrer recessus; metallorum naturas scrutetur, exploret proprietates, nisi hæc omnia genuinæ corporis œconomie aptaverit, in perniciem erunt. Num tenet animo syderum influxus, oppositiones, conjunctiones; cælum stultitiâ petierit, nisi dum orbium cælestium portenta tractare discit, connatos intelligat microcosmi motus, instituta, leges. Infelix! Si vel extero orbi notus, sibi soli sit peregrinus. Stupendi quod habent mechanices & geometriæ theorematà, naturæ miracula quantumlibet explorato, sed cave putes his solis, contineri propriam Medici scientiam. Imo, impedimento erunt nisi evolvendis animalis œconomie mysteris inserviant. Quocumque se vertat Medicus, quid vis agitet consilii, huc unicè tendat oportet tota illius industria, partium actiones, nexus, sympathias; spirituum motus atque naturas; humorum denique virtutes indagare. Verbo dicam

**O**PTIME in arte Medicâ educatum existimes eum, qui sanitatem aut præsentem tueri, aut violatam restituere didicerit. Eò omnia se conferunt medentis vota. At vero quis felicius illuc pertinget quàm qui vitæ leges mortisque causas meditando fuerit affectus? Duo publica sunt artis Medicæ instrumenta, Chymia nimirum & Anatomie. Hujus præsidii partium symmetriam, viscerum usus, alternantes succorum periodos, facili quivis intelliget. Alterius ope humorum ingenia, spirituum indoles, salium, Sulphurumvè energie, spirituum impetus, fuores, elateres in propatulo erunt. His artibus, collatis naturæ legibus, morborum causas pervidet Medicus, signa, nomina, facies agnoscit, eventus odoratur. Nunquid ad medendum aptior fingi potest aut excogitari cognitio? Apagè tot inutilia phantasiæ lascivientis commenta, procul hinc opinionum fragmenta, à vera medendi normâ animum avertunt. Tot fermè diceres fatuos ignes, quæ cum mentibus præluere videntur, easdem ludendo perdunt. Quæ amamus systemata, ejusmodi sunt quæ naturæ nobis exprimunt opera, non quæ fulciendis præjudicatis opinionibus apta facta sunt. Naturam quam nos imitari decet, operantem contemplari juvat. Hanc physiologiam Medico satis esse confidimus. Post rationem enim medicinam querere, philosophi pars est medicinæ rudimenta ne quidem ponentis. Ex œconomia animali de promptas medicinæ rationes addicere, hominis est, artis nostræ pomaria promoveris.

**E**X triplici partium genere pendet animale regimen. Continentes sunt, quibus non secus ac primis vitæ staminibus cæteræ fundantur. Contentarum nomine veniunt, succi quilibet suis receptaculis aut vasis contenti. Utrasque animant aut moderantur impetum facientes. Solidarum dum Eutonia viget, viribus suis utitur corpus, stat ubique inconcussa organorum firmitas. Quandiu integra servantur humorum fœdera, ex æquo retusis variis salium moleculis, ex discordium succorum concordia, ex ipsissimo dissidio pax alta nascitur. In tuto tranquillitas erit, si spiritus quæ nati sunt amabili temperie, vitæ balsamum quoquò versum diffundant. Ab ejusmodi triplici fœdere repetitur functionum harmonia. Inde sanitatis fontes. Hos omnes mutuos consensus qui perceperit, ipsas vitæ leges fuisse affectus. Vera hæc est & propria medentis sapientia, ad cujus normam sua debet dirigere consilia. Hæc omisâ, in vanum arcana naturæ penetralia subit; perperam Acidorum, Alkaliumvè nomina effundit; frustra effervescentias frigidas, calidas, spiritus, sulphura mera crepabit. In tantum hæc omnia medicinam adjuvant, in quantum corporis œconomie motibus, periodis, moribus consonant. Si Triplicis Materie proprietates fuerit persecutus, si Atomorum concursus mente teneat, an hæc medicinam in melius, an in majus promovebunt? an multo securior erit medendi ratio? Revera his omnibus antecellet accurata corporis humani cognitio, quæ cum illius agendi rationes, motus, periodos aperiat, eorundem errores & delicta docet emendare.

**M**EDENTEM ex arte curaturum existimes quem morbidæ origo causæ non fefellerit. Inde manant indicationes quæ curationis clavum & imperium tenere debent. Utrumque suggerit exquisita animalis œconomie scientia: resolutorum membrorum causas investigat? Præsto erunt, si alterna musculos inter & sanguinem commercia noverit, tunc enim nimia sæpe sanguinis mole aut fortiori impetu violatis continentium partium Elateribus, perit solidorum cum fluidis æquilibrium; vult adhibere medicinam? In his reperiet quæ tumultuantis sanguinis insultus compefcere valent. Humoribus impuritate inquinantur succi vitales, suspensio liquorum motu à nativo tramite deficiant: mille ægritudinum modis viscera premuntur, corpulse perturbatur. Rationes quæris & remedia? animo cogita quibus artibus à recementis assidue purgetur sanguinis moles. Hunc in finem quot indigeat incerniculis perpende; qualis & quanta esse debet succorum tenuitas & limpitudo, qui per tot anfractus, per tam subtilia cribra transmitti debeant, statim percipies qualem adhibendam habeas dexteritatem, ne male posito systemate aut quietis moras præceps contemnas, aut agendi tempora fidens prætermittas. Atque ut prudentis est Medici, si prodesse non possit, cavere ne noceat; illud imprimis arte ad naturæ imitationem comparatâ obtinebit ut nusquam peccet, sed captatâ semper rei ubique bene gerendæ occasione, vitatis hinc inde scopulis portum securus attingat.

**N**UM corporis œconomie cognitio abstrusa nimis & obscura videbitur? Alteram quæ ex opinionibus ducitur, incertam magis esse comperies. Tam affabre conspirans partium consensus, tam conveniens & adæquata earum proportio, nunquid non minus imponent quam ingeniosa quævis mentis humanæ fragmenta? Hæc eadem Creatoris providentiâ, quâ nihil conservati nostræ defuturum erit, nihil utique legitimæ illius medelæ deficiet. Ideo tot in humano corpore conspicienda concessit aut obtulit intelligenda, ut veras illius curandi rationes insinuaret. Hinc ex artibus quibus carere nequit Medicus sapiens, primus Anatomie locus debetur. Absit tamen, suâ laude fraudetur ars Chymica; mutuas hæc œconomie animalis cognitioni præstabit operam. Dum enim ingenitas illius operationes æmulari satagit, veras illarum naturas interpretatur, hæc ipsa tamen infida ut plurimum & fallax, si neglectâ naturæ corporis lege, superbiuntium manibus tractetur: suis enim, ut aiunt, Manipulationibus unicè intenti, Majoris Arcani aut Sulphuris ejusdam Gloriosi speciei vitam quidem ipsam instauraturos se pollicentur, interim animas negotiantur; & ad ea quæ ante pedes sunt pericula caligant. Sic hominum fraudes & ingeniorum capturæ magistram artem hominum salutis tantum, ægorum exitio plerumque vertunt; quæ ad naturæ leges, & animalis œconomie normam accommodata, mille præsidii homines beat.

*Ergo propria Medici scientia œconomie animalis cognitio.*

DOMINI DOCTORES DISPUTATURI.

M. Petrus Joannes Burette.  
M. Ludovicus de Vaux.  
M. Petrus Marais.

M. Carolus Contugi, utriusque Pharmacie Professor.  
M. Franciscus Vernage.  
M. Franciscus Fauslus Alliot, Medicus Regis ordinarius.

M. Claudius de Frades.  
M. Abrahamus Thevart.  
M. Nicolaus Morin.

Proponebat Parisiis RAYMUNDUS JACOB FINOT, Parisinus, Baccalaureus Medicus. A. R. S. H. 1698.